

Í yu'xarij ti anaquéecan jo'yú'xaca' a'íjna i San Juan

A'íjna i nyúucarij ti júurij

¹ A'íj tu jin mua'ajmaj tyajá'muayu'se'ej a'íjna jitze ma'can i Ciríistu' ti arí jájcuaj imuáj séjria'ca'aj ajta ti'ij na'aj yatij je're'nyej, a'íi pu a'íin pué'een i tyaj jáanamujri' tyajta i tyaj taji'ij jin jaaséj. Ji'nye tu'ríj jaaséj tyajta tamuáca' jin ja'ajtamuariej. A'íi pu a'íin pué'een i nyúucarij ti júurij. ² A'íi pu i júuricamej huataséjre, ityáj tu jaaséj, tyajta a'íjna jitze ma'can tyí'xaj, tyajta a'yan cha'taj tyana'aj mua'ajmaj tyajá'mua'ixaatye', a'íjna i ti ajta tavástara' jimi séejre', i ti ityájma jimi huataséjre. ³ A'íj tu tyij já'mua'ixaatye' i tyaj jaaséj, tyajta i tyaj jáanamujri', sij sij sijta mua'aj tajamuán séjre'ej, a'yájna tyati'ij ityáj jimi tyí'sejre' i Dios i tyaj jáj táataj, tyajta jimí a'íjna i Jesús i ti ajta Ciríistu' pué'een. ⁴ A'yaa tu een jime' tyajá'muayu'se'ej tyej tyij néijmi'i huátatyamua've'en.

Dios pu a'íin pué'een i tatzárij

⁵ A'íi pu a'íin pué'een i nyúucarij i Ciríistu' ti taamuá'tyej i tyej tyij ityáj já'mua'ixaatye', ti i Dios tatzárij pué'een, ajta quee jimí séejre' a'íjna i tíca'rij. ⁶ Típua'aj a'yan tyetyí'xajta yee jimí tu séejre', tyajta je'en tíca'riste' ciinyej, a'íj tutyij jin tyí'hue'taj, ji'nye catu huatoojé'yacan

jìn tyí'xaj. ⁷ Ajta tìpua'aj a'yan a'íjna jitze tyetyi'tyesejria'aj ì tatzárij, a'yájna tì'íj ajta ì Dios tatzárij tyi'pué'een, a'íj tu jìn jimi séejre', ajta ì xúuria'ra' ì Jesús tì yójra' pué'een ì Dios, a'íi pu néijmi'i tyitacáa'ri'raj ì tyaj jìn ootyá'itzee ì Dios jimi.

⁸ Tìpua'aj a'yan tyetyí'xajta yee catu tyi'tíj jìn á'itzeere' ì Dios jimi, a'yaa tu tyij tajímua'aj tyi'tacuanamuj, capu ij ityájma jimi séejre' a'íjna ì nyúucarij tì jì'ré'can jime', ⁹ ajta tìpua'aj tyaataxáj ì tyaj jìn ootyá'itzee ì Dios jimi, a'yaa pu tyí'rij tyaj jitzán tyú'ca'nyej ì Dios, tì tyámua' eenye' séejre', ajta a'íin tyitaatú'uunyi'raj ì tyaj jìn ootyá'itzee ajta néijmi'i ì tyaj jìn je'ej pua'aj huaríj. ¹⁰ Tìpua'aj a'yan tyetyí'xajta yee catu a'náj tyi'tíj jìn ootyá'itzee ì Dios jimi, a'yaa tu tyé'sejrata tì ì Dios tyí'hue'tacaa, catu tyij tyeexúj tyámua' tyá'antzaahuaj ì nyúucaria'ra'.

2

Ciríistu' pu a'íin pué'een ì tì tajapúa huatányuusij

¹ Mua'aj mu siaj nyiyóojmua' pué'een mu nyaj huápuí'íj já'muaxie've', a'yaa nu tyajá'muayu'se'ej siaj sij quee tyi'tíj jìn á'itzeeria'aj ì Dios jimi. Ajta tìpua'aj a'tíj tyi'tíj jìn ootyá'itzeere'en ì Dios jimi, síj pu tajapúa huatányuusij, a'íi pu a'íin pué'een ì Jesús tì ajta Ciríistu' pué'een, a'íi pu'ij jì'rénya'aj séejre' ì Dios jimi. ² Ciríistu' pu tajitzé ma'can huatóomu'vejritaca' ta'aj ij ì Dios tyitaatú'uunyi' ì tyaj jìn ootyá'itzee, ajta quee ityájma na'aj,

sulu néijmi'caa jime' i maj a'yan huacháatimee i cháanacaj japua.

³ Tipua'aj néijmi'i jin a'yan táarinyij je'ej ti i Dios tyí'ijta, a'yaa tu a'íjna jin tyámua' tyá'mua'reej tyaj ji'r'é'can jime' jamua'tyej. ⁴ Ajta tipua'aj síij a'yan tyí'xajtaj yee: “Nyáaj nu jamua'tyej a'íjci i Jesús”, ajta quee a'yan ricij je'ej ti tyí'ijta i nyúucaria'ra', a'íi pu tyí'hue'tacaa, ajta quee jimi séejre' i ti ji'r'é'can jime'. ⁵ Ajta a'íjna i ti a'yan ricij je'ej ti i nyúucaria'ra' tyí'ijta, a'íi pu arí ji'r'é'can jime' tyámua' een a'íjna jitze i Dios ti jin taxie've', a'íj tutyij jin jamua'reeren ti a'íin jimi séejre' i Dios. ⁶ A'íjna i ti a'yan tyí'xaj ti i Dios jitze ajtyáma'can, a'yaa pu tyúuxie've' ti a'yan cha'tána'aj tyi'tyúucha'ij tí'ij i Ciríistu'.

A'íjna i nyúucarij ti jájcuan jin tyí'ta'ijtye'

⁷ Nye'ihuáamua' mu nyaj já'muaxie've', a'íjna i nyúucarij i nyaj já'muayu'se' capu jájcuj, sulu a'íi pu a'íin pué'een i nyúucarij ti jájcuj imuáj i Dios jin tyitaata'íj. A'íjna i nyúucarij ti jájcuj imuáj jin tyitaata'íj i Dios, a'íi pu a'íin pué'een i nyúucarij i siaj jáanamujri'. ⁸ Ajta a'yájna, a'íjna i nyaj já'muayu'se' nyúucarij pu pué'een ti jájcuj, ti ajta ji'r'é'can jime' i Ciríistu' jimi ajta ja'mua jimi, ji'nye pu'rij antyipua'rij a'íjna i tíca'rij, aj pu'ij huatyóochesij i ti ji'r'é'can jime' tatzárij pué'een.

⁹ Tipua'aj síij a'yan tyí'xajtaj ti a'áa já'ma'can jo'tij jó'nyeeri'ij, ajta je'en i ju'ihuáara' tyicha'íria'aj, a'íi pu óoche' a'áa já'sejre' jo'tij jo'tíca'. ¹⁰ A'íjna i ti jaxie've' i ju'ihuáara' a'íi

pu a'áa já'ma'can jo'tij jó'nyeeri'ij, ajta quee tyi'táj séejre' ti jin ootyá'itzeere'en i Dios jimi. ¹¹ Ajta a'íjna i ti jájcha'íire' i ju'ihuáara', a'íi pu a'áa já'ma'can jo'tij jo'tíca' ajta a'yan tíca'riste' metyojo'cha'can, a'íj pu jin quee jamua'reej jo'tij jooméj, ji'nye i tíca'rij pu a'yan jáaruuj tí'ij aráacunyij.

¹² Nyiyóojmua', a'yaa nu tyajá'muayu'se'ej mua'ajmaj, ji'nye Dios pu tyajamuaatú'uunyi'ri' i siaj jin ootyá'itzee, a'íjna jitze ma'can i Jesús ti ajta Círíistu' pué'een. ¹³ Siajta mua'aj mu siaj hua' huásimua' pué'een, a'yaa nu tyajá'muayu'se'ej, ji'nye mua'aj xu seríj jamua'tyej a'íjna i ti jájcuaj imuáj séjria'ca'aj. Ajta mu siaj tyáamua, a'yaa nu tyajá'muayu'se'ej, ji'nye mua'aj xu seríj tyu'tyáamue'tij a'íjci jitze i ti je'ej pua'aj een.

¹⁴ A'yaa nu nyeríj tyajamuaatayú'sej mu siaj hua'yojmua' pué'een, ji'nye mua'aj xu jamua'tyej a'íjci i tyaj jajvástara'. A'yaa nu nyajta nyeríj tyajamuaatayú'sej mu siaj hua' huásimua' pué'een, ji'nye mua'aj xu seríj jamua'tyej a'íjna i ti jájcuaj imuáj séjria'ca'aj. A'yaa nu nyajta tyajamuaatayú'sej mu siaj tyáamua, ji'nye mua'aj xu uhuácaca'nye' siajta ja'antzaahuaj i nyúucaria'ra' i Dios ja'muaxiéjnyu'caa tzajta', siajta seríj néijmi'i jin tyu'tyáamue'tij a'íjci jitze i ti je'ej pua'aj een.

¹⁵ Caxu jaxie'va'aj i cháanacaj, nusu i ti íiyan tyí'ma'can cháanacaj japua. Típua'aj síj a'yan tya'xié've'ej i cháanacaj, capu jaxie've' i Dios, ¹⁶ ji'nye néijmi'i íiyan ti tyí'sejre' i cháanacaj

japua capu tavástara' jimi tyajá'ma'can, sulu íiyan pu'uj tyí'ma'can. A'íi pu'ij a'ín tyi'pué'een i cháanacaj japua ti a'yan tyí'ma'can: a'íjna i ti je'ej pua'aj een i ti hua' tzajta' eerányinyii, ajta a'íjna i ti séejre' mej mij a'íjna jin ahuóotzaahuatye'en. ¹⁷ Ajta a'íjna i cháanacaj pu'ríj antyipua'rij, jamuán i ti je'ej pua'aj tyí'een, ajta a'íjna i ti a'yan ricij je'ej ti i Dios tyá'xie've', a'íi pu júurij ta'mej jusén jime'.

A'íjna i ti jì'ré'can jime' ajta i ti hue'tzij pué'een

¹⁸ Mu siaj yójmua'mua' pué'een, pu'ríj a'ájna ajtyojo'rényesij i xicáara' ti jitzán néijmi'i tye'entyipua'rij. Mua'aj xu seríj a'yan tyú'namuajri' ti a'yan huataséjre'sij a'íjna i ti jájcha'íire' i Ciríistu', ajta ijíij mu'ríj mue'tíj huataséjre i maj jájcha'íire' i Ciríistu'. A'íj tu jin jamua'reej ti arí néijmi'i tye'entyipua'rij. ¹⁹ A'íi mu ityájma jimi eeráanyej, ajta camu tajitzé ajtyáma'cantaca'aj, jì'nye tìpua'aj tajitzé mua'ajtyáma'cantajche', a'íi mu tajamuán huatya'itzéere'nyijche'. Ajta a'yaa pu tyu'ríj tì'ij tyámua' tyu'taséjre'en maj quee néijmi'i tajitzé ajtyáma'can.

²⁰ Ajta a'íjna i Ciríistu' ti tyámua' een, a'íi pu tyámua' táaruuj a'íjna jime' i júuricama'ra' i Dios, a'íj xu jin mua'aj tyámua' metyityoomuámua're'. ²¹ Canu a'íjna jin tyajá'muayu'se'ej siaj quee jamua'tyej i ti jì'ré'can jime', sulu a'íjna jime' siaj seríj jamua'tyej, siajta a'yan tyá'mua'reej tìquee i'ríj ti hue'tzij huataséjre'en a'íjna jitze i ti jì'ré'can

jime'. ²² ¿A'tanyíj a'íin pué'een i ti tyí'hue'tacaa? A'íi pu a'íin pué'een i ti a'yan tyí'xaj yee capu i Jesús a'íin pué'een i Ciríistu'. A'íi pu a'íin pué'een i ti jájcha'íire' a'íjci i Ciríistu', ji'nye a'yaa pu tyá'hue'taj a'íjna i tyaj jajvástara' ajta a'íjci i yójra'. ²³ A'tíj tina'aj ti a'yan tyá'hue'taj a'íjci i yójra', capu tyámua' jimi tyí'sejre' i tyaj jajvástara', ajta a'íjna i ti a'yan tyí'xaj yee Jesús pu a'íin pué'een i yójra' i Dios, a'íi pu tyámua' tyí'sejre' i Dios jimi.

²⁴ A'íj xu jin mua'aj tyámua' tyeetyécha'íin a'íjci i nyúucarij i siaj jájcuaj jáanamujri', ajta tipua'aj a'íjna i nyúucarij i siaj jájcuaj jáanamujri' tyámua' ja'mua jimi tyu'tyá'itzeere'en, mua'aj xu siajta tyámua' tyi'tyeséere'ej xá'ju'un a'íjna jimi i ti yójra' pué'een i Dios, siajta jimi i tyaj jajvástara'.

²⁵ A'íi pu a'íin pué'een i ti jin tya'tóoratziiiri' ityájma jimi a'íjna i Ciríistu', tyej tyij jusén jin júurij tá'ra'nyij.

²⁶ A'yaa nu een jime' tyajá'muayu'se'ej siaj sij jáamua'reej je'ej maj séecan tyá'xie've' mej mij jamuáacuanamuan. ²⁷ Ajta ja'mua jimi pu arí séejre' a'íjna i júuricama'ra' i Dios, a'íjna i ti jin i Ciríistu' tyámua' jamuáaruuj, a'íj pu jin quee juxie've' ti a'tíj tyajamuáamua'tyej, ji'nye a'íjna i júuricamej ti ja'mua jimi jaatyájtoo, a'íi pu néijmi'i tyaja'muamua'tyej, ajta quee hue'tzij jin tyaja'muamua'tyej. Siata'aj tyámua' jimi tyí'tyesejre'ej i Ciríistu', a'yájna tí'ij i júuricama'ra' i Dios tyajamuáamuá'tyej.

²⁸ Ajta ijíij, mu siaj yójmua'mua' pué'een,

siata'aj tyámua' eenye' i Ciríistu' jimi, tyej tyij jitzán tyú'ca'nyej tí'ij a'yan huataséjre'en, tyajta je'en quee huatátatyevi'ra'astaj tí'ij a'ín uvé'nyej. ²⁹ Ji'nye mua'aj xu a'yan tyá'mua'reej tí i Ciríistu' jí'réenye'ej séejre', ajta a'yan tyúuxie've' siaj jamua'reej tíjin a'íimaj i maj xá'pui' ricij, a'íi mu yójmua'mua' pué'een i Dios.

3

1 maj yójmua'mua' pué'een i Dios

¹ Cási' siata'aj a'íjna jitze tyú'mua'tyij tí i Dios jéehua taxie've', a'íj pu jin a'yan taatamua'aj tyej tyij yójmua'mua' pué'eenye'. A'íj mu jin quee tamuaajtyej a'íimaj i maj a'yan huacháatimee i cháanacaj japua, jí'nye camu majta jamua'tyiej i Dios. ² Nye'ihuáamua' mu nyaj já'muaxie've', tu'ríj yójmua'mua' pué'een i Dios. Tyij ajta quee eexúj je'ej ámiteere' je'ej tyaj éenye'ej tá'ju'un, a'yaa tu tyá'mua'reej tyaj a'yan cha'taj tyana'aj éenye'ej tá'ju'un tí'ij i Ciríistu' tí'ij a'ín huataséjre'en, jí'nye a'áa tu jaséjran je'ej tí a'ín een. ³ Ajta a'tíj tina'aj tí a'yan a'íj jitze tyi'ijchó've', a'íj pu jin tyámua' ju'uurej tí'ij jí'réenya'aj séeria'aj tá'ra'nyij, a'yájna tí'ij ajta i Jesús i tí Ciríistu' pué'een.

⁴ Ajta a'íjna i tí tyi'tíj jin á'itzeere' i Dios jimi, a'íi pu je'ej pua'aj ricij, jí'nye a'íjna i tí jin juxana'cire', a'íj pu jin je'ej pua'aj ricij. ⁵ A'yaa xu'ríj mua'aj tyá'mua'reej tí i Ciríistu' a'íjna jin mujo've'mej tí'ij jó'uunaj i tyaj jin quee xá'pui' huaríj i Dios jimi, a'íjna jime' tí a'íj jimi quee tyi'tíj séejre' tí je'ej pua'aj een. ⁶ A'yaa pu'ij, a'tíj

tina'aj ti i Dios jimi séejre', capu che' tyi'táj jin je'ej pua'aj ricij, ajta a'íjna i ti ooj juxana'cire', a'íi pu quee eexúj yó'itej je'ej ti een a'íjna, capu ajta jamua'tyej. ⁷ Mu siaj yójmua'mua' pué'een, che' quee a'táj já'muacuanamuj, a'íjna i ti xá'puí' tyi'tyúucha'íj, a'íi pu ji'réenya'aj séejre' i Dios jimi, a'yájna ti'íj ajta i Ciriístu' ji'réenye'ej tyí'sejre', ⁸ ajta a'íjna i ti je'ej pua'aj tyi'tyúucha'íj, a'íj pu jitze ajtyáma'can i tyiyáaru', ji'nye a'yaa pu i tyiyáaru' jájcuaj imuáj je'ej pua'aj tyo'huatyóochej. A'íj pu'íj jin mujo've'mej a'íjna i yójra' i Dios, ta'aj ij ja'antypuá'ritye'en i muárie'ria'ra' i tyiyáaru'.

⁹ Capu síj ti yójra' pué'een i Dios je'ej pua'aj ricij, ji'nye a'íj pu jitze eeráma'can i Dios, a'íj pu jin quee i'ríj ti ooj je'ej pua'aj tyi'tyúucha'íj, ji'nye a'íi pu síj a'íin pué'een i ti yójra' pué'een i Dios. ¹⁰ A'yaa pu a'íjna jin tyé'miteere' a'tyán maj yójmua'mua' pué'een i Dios, ajta a'tyán maj yójmua'mua' pué'een i tyiyáaru', ji'nye a'táj tina'aj ti je'ej pua'aj tyi'tyúucha'íj, nusu quee jaxie've' i ju'ihuáara', capu i Dios jitze ajtyáma'can.

I nyúucarij ti ta'ijtye' tyej tyij huátaxie've'en

¹¹ A'íi pu a'íin pué'een i nyúucarij i siaj jájcuaj imuáj jáanamujri' ti a'yan tyúuxie've' tyaj huátaxie've'en séej tyajta séej. ¹² Tyiche' quee a'yan eenye' ti'íj a'íjna i Caín, ti a'íjna jitze eeráanyej i ti je'ej pua'aj een, ajta je'en i ju'ihuáara' huajé'caj. ¿Ji'nye een jin tyeejé'caj? A'íjna jime' i ti je'ej pua'aj

tyi'tyúucha'ïica'aj, ajta a'íjna i ihuáaria'ra' tyámua' pu tyi'tyúucha'ïica'aj.

¹³ Nye'ihuáamua', caxu je'ej tyityóomuajtyaj tipua'aj majamuájcha'ïiria'aj a'íimaj i maj a'yan huacháatimee i cháanacaj japua. ¹⁴ Ityáj tu tyeríj júurij séejre' i Dios jimi catu che' mui'chij, a'yaa tu tyá'mua'reej a'íjna jime' tyaj hua'xie've' i ta'ihuáamua'. Ajta a'táj tiquee jaxie've' i ju'ihuáara', a'íi pu óoche' mui'chíj. ¹⁵ A'íjna i ti jájcha'ïire' i ju'ihuáara', a'íi pu a'íin pué'een i ti tyí'tyacui'caa, siajta mua'aj a'yan tyá'mua'reej tiquee jusén jin júurij huatyá'itzeere'ej a'íjna i ti tyí'tyacui'caa. ¹⁶ A'yaa tu tyá'mua'reej je'ej ti een i tyaj jin huátaxie've'en, ji'nye a'íi pu i Ciriístu' tajitzé ma'can huamuí', a'yaa pu'ij ajta tyúuxie've' tyej tyij a'yan cha'taj tyana'aj ityáj tyityáacui'nyij hua' jitze ma'can i ta'ihuáamua'. ¹⁷ Ji'nye tipua'aj síj chíjtyaanyi' pué'eenye', ajta a'yan tyé'sejra ti i ihuáaria'ra' quee je'ej tyéejviicue'raj, ajta je'en quee jaatáhuïire'en, ¿ji'nye tyí'rij ti jimi séjre'ej a'íjna i ti jin i Dios taxie've'? ¹⁸ Mu siaj yójmua'mua' pué'een, tyiche' quee a'yan tyana'aj tyí'xajtaj yee tyátaxie've', sulu tyiche' a'yan huárinyij je'ej tyaj tyí'xaj.

¹⁹ A'yaa tutyij tyá'mua'reeren tyaj ji'r'é'can jime' tyámua' tyi'tyítacha'ïij, tyajta tyámua' éenye'ej tá'ju'un i Dios jimi, ²⁰ ajta tipua'aj i taxiéjnyu'caa tyi'táj jin tá'xijtye'ej, a'íjna i Dios pu jéetze' va'cán jin antyúumua'reej quee i taxiéjnyu'caa, a'íi pu néijmi'i tyí'mua'reej. ²¹ Nye'ihuáamua' mu nyaj já'muaxie've', tipua'aj

ì taxiéjnyu'caa quee tyi'tíj jin tá'xijtye'ej, a'yaa pu tyí'rij tyaj jitzán tyú'ca'nyej ì Dios, ²² ajta je'en a'íin néijmi'i tyitaatá'sij tyi'tíj tyaj jaatáhuaviiraj, ji'nye a'yaa tu ricij je'ej ti tyí'ijta ì nyúucaria'ra' tyajta tyámua' tyi'tyítacha'íij je'ej ti a'íj tya'ráanajchi. ²³ Ajta ì nyúucaria'ra' a'yaa pu tyí'ta'ijtye' tyej tyij jitzán tyá'antzaahuatye'en ì Ciríistu' ti ajta Jesús pué'een ì ti yójra' pué'een ì Dios, tyajta je'en huátaxie've'en séej tyajta séej je'ej ti a'íin tyitaata'íj. ²⁴ A'íimaj ì maj ja'tzaahuatye' ì nyúucaria'ra' majta jitzán séejre', a'íi pu ajta ì nyúucarij hua' jitze séejre'. A'yaa tu a'íjna jin tyá'mua'reej ti a'íin tatzájta' séejre', a'íjna jime' ti ì júuricama'ra' tajimí huatyá'itzeerej.

4

A'íjna ì júuricama'ra' ì Dios ajta ì xiéjnyu'carij ti jájcha'íire' ì Ciríistu'

¹ Nye'ihuáamua' mu nyaj já'muaxie've', caxu néijmi'caa já'tzaahuatya'aj ì maj a'yan tyúusejrataj maj ì Dios jitze ma'can tyí'xaj, sulu siata'aj anaquéej tyámua' tyihuo'séj siaj sij jáamua'reej tìpua'aj ì júuricamej ì ti hua' jitze séejre' ì Dios jimi já'ma'cantaj nusu quee. Ji'nye jéehua mu a'yan séejre' ì cháanacaj japua ì maj quee huatoojé'yacan jin tyí'xaj ì Dios jimi. ² A'yaa pu'ij tyí'rij siaj sij jáamua'reej a'tíj ti jimi séejre' ì júuricama'ra' ì Dios, a'íjna ì ti a'yan tyaataxáj yee Jesús pu Ciríistu' pué'een, ajta a'yan yee a'yaa pu eenye' yatanyéj t'íj tyévi, a'íi pu ì júuricama'ra' ì Dios jitzán séejre'.

³ Ajta a'íjna i tiquee a'yan tyá'mua'tyej a'íjci i Jesús, capu jimi séejre' i júuricama'ra' i Dios, sulu a'íi pu jitzán séejre' i júuricama'ra' a'íjna i ti jájcha'íire' i Ciríistu'. A'yaa xu mua'aj tyú'namuajri' ti a'íin a'yan huataséjre'sij i cháanacaj japua a'íjna i ti jájcha'íire' i Ciríistu', a'yaa pu'ij tyí'ja'yájna ti a'íin arí a'yan séejre' i cháanacaj japua.

⁴ Nyiyóojmua', mua'aj xu i Dios jitze ajtyáma'can, siajta seríj huo'tyáamue'tij a'íijma i maj tyí'hue'tacaa, ji'nye a'íjna i ti ja'mua jimi séejre', jéetze' pu va'cán jin antyúumua'reej quee a'íjna i ti íiyan séejre' i cháanacaj japua.

⁵ A'íimaj i maj íiyan ma'can i cháanacaj japua, a'íj mu jin a'yan tyí'xaj a'íjna jime' íiyan ti tyí'ma'can cháanacaj japua, majta a'íimaj i maj a'yan ma'can a'íi mu huá'namuaj. ⁶ Tyajta ityáj, a'íj tu jitze ajtyáma'can i Dios. A'íjna i ti jamua'tyej i Dios, a'íi pu tanamuaj, ajta i tiquee jamua'tyej i Dios, capu tanamuaj. A'yaa pu'ij tyí'rij tyej tyij jáamua'reej a'tíj ti ji'ré'can jime' i Dios jitze ma'can tyí'xaj, ajta a'tíj ti hue'tzij jin tyí'xaj.

Dios pu jéehua taxie've'

⁷ Nye'ihuáamua' mu nyaj já'muaxie've', tyiche' huátaxie've'en séej tyajta séej, ji'nye Dios pu ajta a'yan tyí'taxie've' ityájma. A'íjna i ti hua'xie've' i juxa'aj tyeítyee, a'íi pu i Dios jitze ajtyáma'can ajta jamua'tyej i Dios. ⁸ A'íjna i tiquee hua'xie've' i juxa'aj tyeítyee, capu jamua'tyej i Dios, ji'nye Dios pu a'íin pué'een

i ti taxie've'. ⁹ Dios pu taataséjra a'chu ti taxie've', a'íjna jime' ti uyo'ta'ítyaca' i ti a'íjna caa tyi'ijyój, íyan cháanacaj japua, tyej tyij a'íjna jitze ma'can júurij huatyá'itzeere'en i Dios jimi. ¹⁰ A'yaa pu'ij een a'íjna i ti jin i Dios taxie've', capu a'yan huatóomua'aj yee ityáj tu anaquéej jaaxie've' i Dios, sulu a'íi pu anaquéej taataxié'vej ityájma, ajta uyo'ta'ítyaca' i juyój, ti'ij a'íin huatóomu'vejritaj, ajta je'en jó'uunaj i tyaj jin ootyá'itzee i Dios jimi.

¹¹ Nye'ihuáamua' mu nyaj já'muaxie've', tipua'aj i Dios a'yan arí tyitaaxié'vej, a'yaa pu'ij tyúuxie've' tyej tyij a'yan cha'taj tyana'aj ityáj tyityahuátaxie've'en séej tyajta séej. ¹² Capu a'tíj a'náj jaaséj i Dios, ajta tipua'aj tyahuátaxie've'en séej tyajta séej, Dios pu ityájma jimi séejre', ajta i ti jin taxie've' pu ajta ityájma jimi néijmi'i séeria'aj ta'mej. ¹³ A'íjna i ti jin ámiteere' tyaj i Dios jimi séejre', ti ajta a'íin tajimí séejre', a'íi pu a'íin pué'een i júuricama'ra' ti tatzájta' séejre'. ¹⁴ Ityáj tu tyeríj jaaséj, a'íj tu jin a'yan tyí'xaj ti i Dios uyo'ta'ítyaca' i juyój ti'ij hua' japua huatányuunyij a'íimaj i maj a'yan huacháatimee i cháanacaj japua. ¹⁵ A'tíj tina'aj ti a'yan tyu'taxáj yee Jesús pu yójra' pué'een a'íjci i Dios, a'íi pu i Dios jimí séejre' ajta i Dios pu ajta a'íj jimi séejre' i tyéviij.

¹⁶ A'yaa tutyij a'íjna jin tyá'mua'reej, tyajta tyá'tzaahuatye' ti i Dios taxie've', ajta a'íjna i ti a'yan tyihuá'xie've' i juxa'aj tyeítýee, a'íi pu i Dios jimi séejre', ajta Dios pu ajta a'íj jimí

séejre' i tyéviij. ¹⁷ A'yaa pu'ij tajimí tyí'sejre' i tyaj jin taxie've', tyej tyij jitzán tyú'ca'neye' a'ájna xicáara' maj jitzán tá'xijtye'en, ji'nye ityáj tu tyámua' a'yan tyí'tyesejre' i cháanacaj japua a'yájna ti'ij ajta i Ciríistu' ji'rénnya'aj tyí'sejre'. ¹⁸ Jo'maj jóoxie've', capu a'táj tyi'táj jin tyí'tziinye'. Ji'nye i maj jin juxie've' pu néijmi'i putyí'uurej, ajta tipua'aj a'táj tyí'tziinye'ej, a'íi pu ajta tyi'táj jin jajpuéetzij ja'mej. A'íj pu jin a'ájna i ti tyí'tziinye', a'íi pu quee eexúj tyámua' tyihuá'xie've' i juxa'aj tyeítýee.

¹⁹ Ityáj tu hua'xie've', ji'nye i Dios pu anaquéej ityájma taaxié'vej. ²⁰ Tipua'aj síij a'yan tyí'xajtaj yee: “Nyáaj nu jaxie've' i Dios”, ajta je'en jájcha'íirria'aj i ju'ihuáara', a'íi pu tyí'hue'tacaa. Ji'nye tipua'aj a'táj quee jaxie'va'aj i ju'ihuáara' ti jaaséj, capu je'ej tyí'rij ti jaaxié've'en i Dios ti quee a'náj jaaséj. ²¹ I Ciríistu' pu a'ájna i nyúucarij jin tyitaata'íj, ti'ij a'ájna i ti jaxie've' i Dios, che' ajta jaaxie've' i ju'ihuáara'.

5

A'ájna i tyaj jin tyá'tzaahuatye' a'íi pu a'íin pué'een i tyaj jin taxie've'

¹ A'táj tina'aj ti tyá'tzaahuatye' ti Jesús a'íin pué'een i Ciríistu', a'íi pu yójra' pué'een i Dios, ajta a'ájna i ti jaxie've' a'íjci i ti yo'puáara'an pué'een, a'íi pu ajta hua'xie've' i yójmua'mua'. ² Tipua'aj tyáaxie've'ej i Dios tyajta a'yan rijcaj je'ej ti tyí'ijta, a'yaa tu tyá'mua'reej tyej tyajta hua'xie've' a'íimaj i maj yójmua'mua' pué'een i Dios. ³ Tipua'aj tyáaxie've'ej i Dios a'yaa

pu ajta tyúuxie've' tyej tyij ja'rá'astijre'en je'ej ti a'ín tyí'ta'ijtye', ajta capu muárie'rij tyaj ja'rá'astijre'en je'ej ti a'ín tyí'ta'ijtye', ⁴ ji'nye a'íjna i ti yójra' pué'een i Dios, a'í pu hua'antymue'tij a'ímaj i maj a'yan séejre' i cháanacaj japua. Ajta i tyaj jin tyá'tzaahuatye' a'í pu taatá' tyej tyij néijmi'i jin tyu'tyámue'tin. ⁵ A'íjna i ti tyá'tzaahuatye' ti i Jesús a'ín pué'een i yójra' i Dios, a'í pu néijmi'i jin tyu'tyámue'tij íyan cháanacaj japua.

⁶ Ajta a'náj ti i Jesús ti ajta Ciríistu' pué'een ajtáhua'aj a'yan huataséjre ityájma jimi, A'yaa tu a'íjna jin tyá'mua'reej ti'ij a'ín huái'huaca' ajta je'ráaxirej i juxúure' ti'ij huamuí', tyajta quee jájtyij tyana'aj jin a'yan tyá'mua'reej, sulu jájtyij jamuán ajta xúure'ej. Ajta i júuricama'ra' i Dios a'í pu a'yan tyámua' tyá'mua'reej, ajta a'ín pué'een i júuricamej ti j'ré'can jime' tyí'xaj. ⁷ Majta huéecaj i maj a'yan tyámua' tyá'mua'reej: ⁸ a'íjna i júuricama'ra' i Dios, i jájtyij i ti jin huái'huaca' i Jesús, ajta i xúure'ej i ti je'ráaxirej i Ciríistu' ti'ij huamuí' i cúruuj jitze, majta a'ímaj i maj huéecaj, néijmi'i mu juxa'aj mana'aj tyí'xaj. ⁹ A'yaa tu tyá'antzaahuaj je'ej maj tyu'taxájtaca' i tyeíttee, ajta jéetze' tyí'huüre' tyaj ja'antzaahuatye'en je'ej ti i Dios tyí'xaj, ji'nye a'í pu a'íjna jitze ma'can tyu'taxájtaca' i juyój. ¹⁰ A'íjna i ti tyá'tzaahuatye' i yójra' jimi i Dios, a'í pu nyúucarij jitzán tyí'sejre', ajta i ti quee tyá'tzaahuatye' i Dios jimi, a'yaa pu tyé'sejrata i Dios ti'ij i ti tyí'hue'tacaa, a'íjna jime' ti quee

ja'tzaahuatye' je'ej ti i Dios tyu'taxájtaca' i juyó jitze ma'can. ¹¹ A'íjna i nyúucarij i Dios ti jaataxájtaca' a'íi pu a'íin pué'een i ti taatá'sij tyej tyij júurij huatyá'itzeere'en, ajta a'íjna i júuricamej a'íj pu jitze eerányinyii i yójra' i Dios. ¹² A'tíj ti jimi séejre' a'íjna i ti yójra' pué'een i Dios, a'íi pu júurij huatyá'itzeere'ej jusén jime', ajta i tiquee jimi séejre' capu júurij ta'mej.

¹³ A'yaa nu mua'ajmaj tyajá'muayu'se'ej mu siaj tyá'tzaahuatye' a'íjci jimi i yójra' i Dios, siaj sij jáamua'reej siaj júurij huatyá'itzeere'en jusén jime'.

¹⁴ Jitzán tu tyí'ca'nyej i Dios, ji'nye a'yaa tu tyá'mua'reej tijin tìpua'aj tyi'tíj tyaatáhuavii je'ej ti a'íin tya'ajxié'vi'ra', a'íi pu tanamuajran.

¹⁵ Ajta a'yájna tyati'ij tyá'mua'reej ti i Dios tanamuaj je'ej tyaj tyi'tíj tyaatáhuaviiraj, a'yaa tu tyajta tyáamua'reej tyaj a'yan tyé'ejcha'ij je'ej tyaj tyi'tíj tyaatáhuaviiraj.

¹⁶ Tìpua'aj síj a'yan tyé'sejra ti i ihuáaria'ra' tyi'tíj jin je'ej pua'aj ricij, tiquee a'yan tyá'ci'puaj tí'ij a'íjna jin huámui'nyij, che' jime' jaatáhuavii i Dios, ta'aj ij i Dios jaatá'an ti júurij tá'ra'nyij, tìpua'aj tyi'tíj jin a'yan rijcaj tiquee jaci'puaj tí'ij a'íjna jin huámui'nyij. A'yaa pu ajta tyí'sejre' i ti jin a'tíj ootyá'itzeereej tí'ij ajta a'íjna jin huámui'nyij, a'íjna jime' canu a'yan tyajá'mua'ijtye' siaj a'íjna jin jaatáhuavii.

¹⁷ Néijmi'i i maj jin je'ej pua'aj ricij, a'íj mu jin juxana'cìre', ajta pu ityájma jimi séejre' i maj jin á'itzeere', i tiquee a'yan tyihuá'ci'tyij mej mij a'íjna jin huácui'nyij.

18 A'yaa tu tyá'mua'reej tiqee tyi'táj jin á'itzeere' a'íjna i Dios ti jimi séejre', ji'nye a'íi pu i yójra' i Dios jacha'ij, ajta a'íjna i ti je'ej pua'aj een capu je'ej joorej a'íjci i a'táj. 19 A'yaa tu tyá'mua'reej tyaj i Dios jitze ajtyáma'can, majta néijmi'i i maj a'yan huacháatimee i cháanacaj japua, a'íi pu tyihuá'ijtye' i xiéjnyu'carij ti je'ej pua'aj een. 20 A'yaa tu tyajta tyá'mua'reej ti i yójra' i Dios yatanyéj, ajta taatá' tyej tyij yó'itej tá'ra'nyij, tyajta jáamua'tyij a'íjna i ti ji'réc'can jime' Dios pué'een. A'íj tu jitze ajtyáma'can i yójra' i Dios, a'íi pu'ij a'íin pué'een i Jesús ti ajta Ciríistu' pué'een. A'íi pu a'íin pué'een i Dios ti ji'réc'can jime' séejre', ti ajta taatá'sij tyej tyij júurij tá'ra'nyij jusén jime'. 21 Mu siaj yójmua'mua' pué'een, siata'aj tyámua' tyityahuóocha'íin a'íijma jimi i maj hue'tzij jin jusejrataj.

**I nyúucarij ti jájcua ti a'ijna á'xaj i
Tavástara' i Jesús ti Ciríistu' pue'een ajta
Salmos
Cora, Santa Teresa: I nyúucarij ti jájcua ti a'ijna
á'xaj i Tavástara' i Jesús ti Ciríistu' pue'een ajta
Salmos New Testament+**

copyright © 2016 Wycliffe Bible Translators, Inc.

Language: Cora, Santa Teresa

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

4f03662f-a4e0-5c7c-a13b-0b7002b5b8f6